

【像慧仔个天才】葉秋菊原作

「人不可貌相，海水不可斗量」這句話來講阿明牯，實在盡對般¹。佢乜相信天公爺攞你關忒一扇門，定著會攞你打開另外一扇窗。

見擺佢兜愛重新分班該下，心情就像老鼠跌落米缸肚，一重歡喜一重愁，歡喜个係做得熟事新朋友，愁个係毋知會有牛頭馬叉攞佢分共班無？當記得開學該日，遠遠看著一個手癟癟、腳跛跛个細佬仔行落教室肚，該個人頭臥臥，嘴弛弛²仔緊行緊笑，看起來慧慧噹噹，佢胚佢怕係行毋著教室，愛去隔壁个資源班正著啊！

該個細佬仔的對³坐在佢隔壁。先生特別紹介佢，講佢安到張忠明，手腳毋方便，愛打幫坐佢脣頭个人，發揮同學愛，搵手照顧。張忠明？佢話著⁴係當聰明，險險笑出聲來，一想著新个一年愛攞佢比比坐，面就端忒⁵一半。佢頭側側偷看佢，唉！生著白淨白淨算係已清秀个細佬仔，總係透日仔口水澹澹汀汀⁶，攞頸根圍

等該條脰弛仔⁷，汀到潦潦，分人看著目汁就會跌出來，同情心在佢个心肝肚慢慢翻轉，佢定定仔幹轉頭攞佢笑一下，佢試著佢已得人惜哦！

佢該班个綻剝頭⁸總係撩撩刁刁，奈冬瓜毋何，捉瓠仔來捋毛，看忠明好欺負，就學佢行路孔孔翹翹个樣相，無就撚佢个屎肫，好性个阿明牯斯目瞞瞞仔由在人搥耍⁹，佢一肚懊躁，搭纏拳頭嬾，當想行前去替佢出頭。

阿明牯當自重，攞佢共樣上課，共樣寫作業，斯寫字較食力，較摸掌¹⁰定定，學生仔該當愛做个本分，佢毋識懈怠過。有一日上數學，先生出一隻題目難過上天，佢頭那想到必乜想毋出來，大家額結結仔無人曉得，哪會胚著阿明牯噯毋使兩分鐘就做出來。大家目珠睜到大嬾粒，焮鏢¹¹講到鉢乜無人愛信，慧牯仰會變精咧呢？原來佢係一個天才啊，起先話著佢係慧仔个佢，敗勢到面紅濟炸，還想尋隻空鑽落去！

見擺看著搞到昏天暗地毋知頭天个佢兜，攞拿等隨身聽恬恬聽英文，嘴叮迪迪凸凸背出一大串英文單字个佢，就會面紅，實在爭天差地啊！人講：一枝草一點露，天公爺係公當个，雖然無分佢健全个軀身¹²，毋過分佢聰明个頭腦、上進个心，在未來个路項，毋使為佢煩惱、為佢愁咧。

¹ 對般：音 duiˋ banˋ；喻合適、貼切。

² 嘴弛弛：音 zhoiˋ rheˋ rheˋ；嘴咧得開開的。

³ 的對：音 dag duiˋ；正巧。

⁴ 話著：音 vaˋ doˋ；以為。

⁵ 端忒：音 feˋ ted；歪了。

⁶ 澹澹汀汀：音 dam dam dinˋ dinˋ；滴水貌。

⁷ 脰弛仔：音 goiˋ rheˋ er；圍在脖子上的圍兜。

⁸ 綻剝頭：音 canˋ dogˋ teu；頑皮的男孩。

⁹ 搥耍：音 med saˋ；捉弄。

¹⁰ 摸掌：音 moˋ soˋ；動作緩慢。

¹¹ 焮鏢：音 pu lo；用生鐵鑄的炊具。

¹² 軀身：音 vu shinˋ；身軀，身體。